

LAI TCHAIRPIGNIERE D'MON PÉRE, ÌN B'SAIN PO LAI FÉRME



Les paiyisains dain le temps, en pu d'yôs métié et s'lon yôs pôssibilités, aivînt des aictivités en pu en huvie, copou, m'nujie, sabatie et s'vent tcharpignie. Brâment de paiyisains trassaient les p'nies qu'ai foyait en lai férme, tchairpaignes po ramaisai les pommes de tiere, poitchaie le bôs po l'fue, o bin lai tieuyatte des pammes mains achi le raimaisaidge des fruts qu'éfîns botès dîn ìn véché en tchéne po fèrmentaie aivînt de dichillaie lai gotte. Dînli, mon pére, dev'niait tcharpignie duraint les lovrées à métchain temps. E trassait des tchairpaignes rondes avô dou ainses, d'âtres d'aivô ran qu'enne ainse, aipp'laie « p'nie ai tchîn » et pe achi des « crates » rondes daivô dou p'tetes ainses laivousque paissait enne lainiere po lai poitchaie en bandoyière po tieudre les cl'éges et pe tieuri les moûechirons.

L'osie utilisaié étaié copè t'chu des sacies piantès a long d'în terra, prou po l'eusaidge de mon pére. Dâs les premières d'gealées, les feuyies étant tchoés, les brainces éfînt copaies t'chu ces aibrâs daivô enne bolatte ai ìn mètre de hât, laivousque recrâchait tot les ans de novés raims, ces qu'on aippeule l'osie. Loiyie en faichîns es éfînt trézyies en l'hôta, poi taye, et loiyies en p'tèt faichîns. Quéqu'yuns éfînt botès dîns l'ave po que dâs le paitchi feu, tiaind qu'lai saive montait et qu'les feuyies se fourmaient, lai pée étaié rôtée, frelat aiprés frelat, daivô ìn util réalisé d'aivô enne tidje de fie piayie tchu lie, po prôdure l'osie biainc, résavrè é bés p'nies.

Mon pére f'sait sai bésaigne de tcharpignie dain le poiye, à long d'lai tieujenne duraint les lovraies d'huvie, aiprés aivoi boussaie lai tâle, qu'étaie toudge à moitant, dains ìn càre. E f'sait tot l'traissaidge tchu ses tieuches o bin e serrait entre ses dgenonyes l'ôvraidge E n'y aivait pe fâte de brament d'utilis, son couté et un sécateur, défimeus effutès, et pe ìn poinçon. Ses mains qu'el aivait c'ment des taipoures è mes eûyes d'afaint, lu siedrait de trassie en serraint c'ment qu'é fât l'osie po que lai tchairpaigne aich'vaie, rechartait roide aipré ìn satchaidge compié. D'vaint é f'sait le fond qu'é foumait t'chu son dgenonye, é y bottaie les montaints que balayînt le poiye aivaint d'être aittaitchie poi yos capirons pô permâttre de trassie le toué qu'é ryeuvaie tchétche còp en trassaint des moéchés d'osie, qu'é aivait euvie en trà, têt di long

Lai bodjure di hât, trassée d'aivô le rechte des montaints, finissait le toué en le roidissaint. D'aivô le rechte des montaints é trassait oncque enne bodjure dô le fond que poyait se rempiaire tiand qu'elle a eûsaie. Les ainses, dous po les grantes tchairpaignes, yenne po les « p'nie ai tchîn », aichvaie ces bés ôvraidges âchi régulie. I n'ai djanmais d'maindaie en mon pére le ch'crèt d'sai tressaidge mais i ai brament ravotaie ses dgèstes taint d'còp répètès. Adj'dêu, i é le piaîji de r'trovaie ci savoifaire et de r'prôdure ces dgèstes à sain d'lai rote « vanneries des terroirs ».



Serge Prétat